

摘藻堂四庫全書薈要

經部

欽定四庫全書薈要

經部
詩地理攷卷二

詳校官原任侍講臣王燕緒



欽定四庫全書薈要

詩地理攷

提要



臣等謹案詩地理攷六卷宋王應麟撰其書全錄鄭氏詩譜又旁採爾雅說文地志水經以及先儒之言凡涉於詩中川谷地名者會萃成編然皆兼采諸書案而不斷故得失往往並存如小雅六月之四章獫狁匪茹整居

焦獲侵鎬及方至于涇陽其五章曰薄伐玁狁至于太原其地於周為西北鎬方在涇陽外焦獲又在其外而太原更在焦獲之外故劉向疏稱千里之鎬猶以為遠孔穎達乃引郭璞爾雅注池陽之瓠中以釋焦獲考漢書池陽屬左馮翊而涇陽屬安定不應先至焦獲乃至涇陽穎達又以太原為晉陽是玁狁西來周師東出尤乖地理之實殊失訂正又

大雅韓奕首章曰奕奕梁山其六章曰溥彼
韓城燕師所完應麟引漢志夏陽之梁山通
典同州韓城縣古韓國以存舊說兼引王肅
言燕為北燕國及涿郡方城縣有韓侯城以
備參考不知漢王符潛夫論曰昔周宣王時
有韓其國近燕水經注亦曰高梁水首受灤
水於戾陵堰水北有梁山是王肅之說確有
明証應麟兼持兩端亦失斷制然如騶虞毛

傳云仁獸賈誼新書則曰騶者天子之囿侯
我于著毛傳云門屏之間曰著漢志則以為
濟南著縣彪池北流毛傳云彪流貌水經注
則有彪池水十道志亦謂彪池一名聖女泉
兼采異聞亦資考證他如二子乘舟引左傳
盜待于萃之說秦穆三良引括地志家在雍
縣之說皆經無明文而因事以存其地其徵
引實為該洽固說詩者所宜考也乾隆四十

一年三月恭校上

總纂官臣紀昀臣陸錫熊臣孫士毅

總校官臣陸費墀

詩地理攷自序

詩可以觀廣谷大川異制民生其間者異俗剛柔輕重
遲速異齊聲音之道與政通矣延陵季子以是觀之太
史公講業齊魯之都其作世家於齊曰洋洋乎固大國
之風也於魯曰洙泗之間斷斷如也蓋深識夫子一變
之意班孟堅志地理叙變風十三國而不及二南豈知
詩之本原者哉夫詩由人心生也風土之音曰風朝廷
之音曰雅郊廟之音曰頌其生於心一也人之心與天

地山川流通發於聲見於辭莫不繫水土之風而屬三
光五嶽之氣因詩以求其地之所在稽風俗之薄厚見
政化之盛衰感發善心而得性情之正匪徒辨疆域云
爾世變日降今非古矣人之性情古猶今也今其不古
乎山川能說為君子九能之一毛公取而載於傳有意
其推本之也是用据傳箋義疏參諸禹貢職方春秋爾
雅說文地志水經罔羅遺文古事傳以諸儒之說列鄭
氏譜十首為詩地理攷讀詩者觀乎此亦升高自下之

助云王應麟伯厚甫自序

欽定四庫全書薈要卷一千九十五

經部

詩地理攷卷一

宋 王應麟 撰

總說

王制天子五年一巡守命大師陳詩以觀民風

書大傳聖王巡十有二州觀其風俗習其情性因論十

有二俗定以六律五聲八音七始

漢食貨志孟春之月羣居者將散行人振

木鐸徇于路以采詩獻之大

師比其音律以聞于天子

太史公曰聞之董生詩記山川谿谷禽獸草木故長於

風匡衡曰竊考國風之詩周南召南被賢聖之化深故
篤於行而廉於色鄭伯好勇而國人暴虎秦穆貴信而
士多從死陳夫人好巫而民淫祀晉侯好儉而民畜聚
大王躬仁邠國貴怨由此觀之治天下者審所上而已
鄭氏詩譜序詩之興也諒不於上皇之世大庭軒轅逮
於高辛其詩有亡載籍亦蔑云焉虞書曰詩言志歌永
言聲依永律和聲然則詩之道放於此乎有夏承之篇
章泯棄靡有了遺邇及商王不風不雅何者論功頌德

所以將順其美刺過譏失所以匡救其惡各於其黨則
為法者彰顯為戒者著明周自后稷播種百穀黎民阻
飢茲時乃粒自傳於此名也陶唐之末中葉公劉亦世
修其業以明民共財至於大王王季克堪顧天文武之
德光熙前緒以集大命於厥身遂為天下父母使民有
政有居其時詩風有周南召南雅有鹿鳴文王之屬及
成王周公太平制禮作樂而有頌聲興焉盛之至也本
之由此風雅而來故皆錄之謂之詩之正經後王稍更

陵遲懿王始受譖亨齊哀公夷身失禮之後邾不尊賢
自是而下厲也幽也政教尤衰周室大壞十月之交民
勞板蕩勃爾俱作衆國紛然刺怨相尋五霸之末上無
天子下無方伯善者誰賞惡者誰罰紀綱絕矣故孔子
錄懿王夷王時詩訖於陳靈公淫亂之事謂之變風變
雅以為勤民恤功昭事上帝則受頌聲弘福如彼若違
而弗用則被刼殺大禍如此吉凶之所由憂娛之萌漸
昭昭在斯足作後王之鑒於是止矣夷厲已上歲數不

明大史年表自共和始歷宣幽平王而得春秋次第以立斯譜欲知源流清濁之所處則循其上下而省之欲知風化芳臭氣澤之所及則傍行而觀之此詩之大綱也舉一綱而萬目張解一卷而衆篇明於力則鮮於思則寡其諸君子亦有樂於是與

文中子曰諸侯不貢詩天子不採風樂官不達雅國史不明變斯則久矣詩者民之情性也情性能亡乎非民無詩職詩者之罪也

周南 名南

鄭氏譜曰周召者禹貢雍州岐山之陽地名今屬右扶風美陽縣地形險阻而原田肥美周之先公曰大王者避狄難自豳始遷焉而修德建王業商王帝乙之初命其子王季為西伯至紂又命文王典治南國江漢汝旁之諸侯於時三分天下有其二以服事殷故雍梁荆豫徐揚之人咸被其德而從之文王受命作邑於豐乃分岐邦周召之地為周公旦召公奭之采地施先公之教

於已所職之國武王伐紂定天下巡守述職陳誦諸國之詩以觀民風俗六州者得二公之德化尤純故獨錄之屬之大師分而國之其得聖人之化者謂之周南得賢人之化者謂之召南言二公之德教自岐而行於南國也乃棄其餘謂此為風之正經初古公亶父聿來胥宇爰及姜女其後大任思媚周姜大姒嗣徽音歷世有賢妃之助以致其治文王刑於寡妻至于兄弟以御于家邦是故二國之詩以后妃夫人之德為首終以麟趾

騶虞言后妃夫人有斯德興助其君子皆可以成功至
于獲嘉瑞風之始所以風化天下而正夫婦焉故周公
作樂用之鄉人焉用之邦國焉或謂之房中之樂者后
妃夫人侍御於其君子女史歌之以節義序故耳射禮
天子以騶虞諸侯以貍首大夫以采蘋士以采芣為節
今無貍首周衰諸侯並僭而去之孔子錄詩不得也為
禮樂之記者從後存之遂不得其次序周公封魯謚曰
文公召公封燕謚曰康公元子世之其次子亦世守采

地在王官春秋時周公召公是也問者曰周南召南之詩為風之正經則然矣自此之後南國諸侯政之興衰何以無變風答曰陳諸國之詩者將以知其缺失省方設教為黜陟時徐及吳楚僭號稱王不承天子之風今棄其詩夷狄之也其餘江黃六蓼之屬既驅陷於彼俗又亦小國猶邾滕紀莒之等夷其詩蔑而不得列於此黃氏曰二南皆文王之化而附之二公豈容有聖賢之辨

孔氏曰或以為東謂之周西謂之召事無所出未可明

也陳氏曰周公召公為天子之二老分治岐之東西自岐以東周公主之然岐東之地宗周在焉故雖周公所治之國其實王者之風也朱氏曰周國名南南方諸侯之國也

文王使周公為政於國中而召公宣布於諸侯於是德化大成於內而南方諸侯之國江沱汝漢之間莫不從化成王立周公相之制禮作樂乃采文王之世風化所及民俗之詩其得之國中者雜以南國之詩而謂之周南言自天子之國而被於諸侯不但國中而已也其得之南國者則直謂之召南言自方伯之國被於南方而

不敢繫於天子也岐周在今鳳翔府岐山縣

括地志周公故城在

岐山縣北九里台公故城在岐山縣西南十里此周召之來邑也

史記正義太王居

周原因號曰周

通鑑外紀古公邑于岐山之陽始改

國曰周

郡國志美陽有周城

括地志周城一名美

陽城在雍州武功縣西北二十五里即太王城也

今京兆府

左傳周桓公注周采地扶風雍縣東北有周城 史

記自序太史公留滯周南

摯虞曰古之周南今之洛陽張晏曰洛陽而謂周南者

自陝以東皆周南之地

補傳曰武王克商又分二公為左右成

王時復分陝以東周公主之分陝以西召公主之

周公居東

為洛陽召公居西即雍縣召亭雍與洛皆周之中土其化行於南國

孔子論先王之道必

及周召述三王之迹亦必及周召見聖人屬意於此國風

終於美周公二雅終於思召公聖人刪詩蓋傷衰亂之

極非周召不能救也公羊傳自陝而東者周公主之

自陝而西者召公主之

注陝蓋今弘農陝縣是也水經陝縣故城注云周召分伯以

此城為東西之別孔氏曰公羊傳漢世之書陝縣漢弘農郡所治其地居二京之中故以為二伯分掌之界周之所分亦當然也朱氏曰公羊分陝之說可疑蓋陝東地廣陝西只是關中雍州之地恐不應分得如此

不均 黃氏曰分陝當在武王得天下之後而二南之繫

當在二公既分陝之後 郡國志陝縣有陝陌二伯所

分 括地志陝原在陝州陝縣西南二十五里分陝從

原為界 集古錄陝州石柱相傳以為周召分陝所立以別地里

呂氏春秋禹巡

省南土塗山氏之女候禹于塗山之陽乃作歌曰候人

兮猗實始作為南音周公召公取風焉以為周南召南

程氏曰鼓鍾之詩曰以雅以南季札觀樂有舞南籥者二南之籥也文王世子有胥鼓南則南之為樂信矣

孔叢子云孔子讀詩曰吾於二南見周道之所成左傳吳公子札觀周樂歌周南召南曰美哉始基之矣猶

未也然勤而不怨矣儀禮注皆大王王季居岐山之陽躬行召南之教以興王業及文王而行周南之教以
命受

自北而南

孔氏曰書西伯戡黎注云文王為雍州之伯南兼梁荆
文王之國在於岐周東北近於紂都西北迫於戎狄
故其風化南行也從岐周被江漢之域

河洲

朱氏曰河北方流水之通名

莊子音義云北人名水皆曰河

曹氏曰

周地東表大河

禹貢注雍州東據河

爾雅水中可居曰洲 韓

詩章句曰河之洲蔽隱無人之處

說文作州

南有樛木

南有喬木

毛氏曰南南土也鄭氏曰南土謂荆揚之域 孔氏曰

木盛莫如南土禹貢揚州厥木惟喬周官正南曰荊州

東南曰揚州二州境界連接故以南土為荆揚與南有喬

木同

朱氏曰南山也

南國

朱氏曰南方之國即今興元府京西湖北等路諸州

商書

大匡曰三州之侯咸率程典曰六州之侯奉勤于商六州雍梁荆豫徐揚歸文王

漢廣江漢之域

韓詩漢廣悅人也江之漾矣

漾長也說文作羗

黃氏曰江水

自茂州汶山縣至通州海門縣入海漢水二源一源出

秦州天水縣謂之西漢水至恭州巴中縣入江一源出

大安軍三泉縣謂之東漢水至漢陽軍入江

水經注地理郡國志

並言漢有二源東出氐道西出西縣東西兩川俱出嶓冢而同為漢水通典秦州上邽縣嶓冢山西漢水所

出經嘉陵曰嘉陵江經閬中曰閬江漢中金牛縣嶓冢山禹導漾水至此為漢水亦曰沔水上邽今廢入清水金牛今廢入褒城蔡氏曰東源在今西縣之西西源在今三泉縣之東

李氏曰漢水出

興元府西縣嶓冢山

水經鮒嶓山

東流至漢陽軍大別山南

入于江

水經至江夏沙羨縣北南入于江今鄂州江夏縣

江水出茂州汶山

岷山

又謂之汶山今汶山縣朱氏曰出永康軍岷山

東流至蘇州許浦入海

朱氏曰東

流與漢水合東北入海杜氏曰經南郡江夏至廣陵入海

大別之東彭蠡之西乃

江漢合流之處

作詩者在江漢合流之處自歸州秭歸至鄂州武昌凡一千四百

易氏曰江

餘里漢自均州武當至漢陽軍漢陽縣凡一千四百餘里皆荊州之地江漢分流於其間至是合流

括地志

江水源出岷州南岷山過荊州與漢水合漢水源出梁州金牛縣東二十八里嶓冢山至荊州與大江合為夏水

夾漈鄭氏曰周為河洛名為岐雍河洛之南瀕江

岐雍之南瀕漢江漢之間二南之地詩之所起在於此
屈宋以來騷人辭客多生江漢故仲尼以二南之地為
作詩之始 林氏曰江漢在楚地詩之萌芽自楚人發
之故云江漢之域詩一變而為楚辭即屈原宋玉為之
唱是文章鼓吹多出於楚也 朱氏曰江漢之俗其女
好遊漢魏以後猶然如大堤之曲可見也

水經注方山下水曲之隈

云漢女簪遊處也張衡南都賦遊女弄珠於漢皋之曲漢皋即方山之異名在襄陽縣

孔氏曰

江漢之域即荆梁二州戴氏曰漢廣採於江漢而得

之嚴氏曰江水尤深闊於漢故漢止言不可泳而江

言不可方

爾雅漢南曰荊州江南曰揚州注此蓋殷制陳氏曰汝墳是已被文王之化者江漢是

聞文王之化而未被其澤者

汝墳

韓詩汝墳辭家也列女傳周南大夫受命平治水土

過時不來其妻恐其懈於王事言國家多難惟勉強之

無有譴怒遺父母憂乃作詩 李氏曰汝水周南之水

也出汝州魯山東南

朱氏曰出汝州梁縣天息山

博

陽縣大孟山

地理志出定陵縣高陵山

水經注亦出魯

魯陽今汝州魯山縣定陵今潁昌府舞陽縣

至蔡州褒

信縣入淮

杜氏曰至褒信入淮

朱氏曰

逕蔡潁州入淮地理志至新蔡入淮說文出廬氏還歸

山東入淮

爾雅汝為瀆郭璞注引詩遵彼汝瀆大水溢出

別為小水之名又曰汝有瀆疏李巡曰汝旁有肥美之

地

水經注瀆水亦謂大瀝水爾雅汝有瀆瀆者汝別也

周禮大司徒注水厓

曰墳 毛氏曰墳大防也

楚辭哀郢登大墳以遠望朱氏曰水中高者曰墳詩汝墳

是也 孔氏曰謂汝水之側厓岼汝墳之國以汝厓表國

所在猶江漢之域非國名也伐薪宜於厓岼大防之上

不宜在汝濱之間字當從土

地理志汝南郡汝陰縣莽曰汝濱輿地廣記汝陰縣

唐為潁州

孔氏曰汝漢之濱先被文王之教 戴氏曰汝

濱採於汝墳之國而得之

郡國志汝南郡汝陰注地道記有陶丘鄉詩所謂汝濱

王室

朱氏曰王室指紂所都也文王三分天下有其二而率商之叛國以事紂故汝墳之人猶以文王之命供紂之

役段氏曰周民猶知商之為王室文王之心可見矣

召南

釋文召地名在岐山之陽扶風雍縣南有召亭朱氏

曰召公奭之采邑也水經注雍水東逕邵亭南世謂

之樹亭川

蓋聲相近

亭故召公之采邑又京相璠曰亭在周

城南五十里

郡國志注雍召穆公采邑

穆公康公之後

括

地志邵亭故城在岐州岐山縣西南十里故召公邑

今鳳

翔府

程氏曰召伯為諸侯長故諸侯之風主之於台南

陳氏曰自岐以西召公主之故岐西之地為召公專主諸侯之國而為諸侯之風朱氏曰分岐東西之說無據而召公所分之地愈狹蓋僅得隴西天水數郡之地耳恐無此理蘇氏曰文王治周

所以為其國者屬之周公所以交於諸侯者屬之召公大雅曰昔先王受命有如召公曰辟國百里言其治外也鄭氏曰食采於召作上公為二伯孔氏曰食采

文王時為伯武王時

樂記武王分周公左召公右

孟子云文王以百

里王則周召之地共方百里而皆名曰周其召是周內

之別名

康王之誥大保率西方諸侯

傅氏曰二南之國始於文王

之分岐成於武王之分陝而其詩定于周公之作樂

李氏曰江漢汝墳即陝之東也江沱即陝之西也孔

氏曰春秋時周公召公別於東都受采存本周召之名

非復岐周之地晉書地道記河東郡垣縣有名亭周則

未聞今為召州是也

唐地理志絳州垣縣武德元年曰邵州今垣曲縣

通典

河南府王屋縣古召公之邑

今屬孟州

傅氏曰武王分陝

之後徙於王屋

郡縣

志王屋縣本周時召武公之采邑今按此春秋時召公之采地

甘棠 南國

九域志召伯甘棠樹在陝州府署西南隅 括地志召
伯廟在洛州壽安縣西北五里召伯聽訟甘棠之下周
人思之不伐其樹後人懷其德因立廟有棠在九曲城
東阜上

今河南府

說苑傳曰召公述職當桑蠶之時不欲

變民事故不入邑中舍于甘棠之下而聽斷焉陝間之
人皆得其所是故後世思而歌詠之 曹氏曰繫之周
公則由雍州以至荆揚東南之域也繫之召公則由岐
山以至梁益西南之域也武王伐紂有庸蜀羌髳微盧

彭濮八國之人為助其服周之化久矣召伯能以先王所以教者宣明於其國是以見美也

江有汜

爾雅水決復入為汜 朱氏曰今江陵漢陽安復之間

蓋多有之

楚辭哀郢遵江夏以流亡江大江也夏水也或以為自江而別以通于漢還復入江冬竭

夏流故謂之夏其入江處今名夏口即詩所謂江有汜也 洪氏楚辭補注曰水經云夏水出江流于江陵縣東南注云江津豫章口東會中夏口是夏水之首江之汜也

說文作汜

江沱

禹貢荊州梁州皆有沱孔氏曰發源梁州入荊州

水經氏道

縣江水又東別為沱注云開明之所鑿也郭景純謂玉壘作東別之標今茂州汶山縣通典沱水在彭州唐

昌縣今崇寧縣

蔡氏曰爾雅水自江出為沱南郡枝江縣有

沱水然其流入江而非出於江也華容縣有夏水首出

于江尾入于沔亦謂之沱此荊州之沱蜀郡郫縣江沱

在東西入大江

今成都府郫縣

汶江縣江沱在西南東入江

今永

康軍導江縣

此梁州之沱黃氏曰沱自導江縣分江東至

眉州彭山縣入江李氏曰禹貢岷山導江東別為沱

梁州之域也江沱之間即梁州之界乃岐西之地居江沱者以江沱起興

江有渚

韓詩章句一溢一否曰渚 爾雅小洲曰渚 毛氏曰水歧成渚

騶虞

賈誼新書騶者天子之囿也虞者囿之司獸者也 魯

詩傳曰古有梁騶者天子之田也

班固東都賦制同乎梁鄒 歐陽氏曰賈

誼以騶者文王之囿名國
君順時政于騶囿之中

邶 鄘 衛

鄭氏譜曰邶鄘衛者商紂畿內方千里之地其封域在
禹貢冀州大行之東北踰衡漳東及兗州桑土之野周
武王伐紂以其京師封紂子武庚為殷後庶殷頑民被
紂化日久未可以建諸侯乃三分其地置三監使管叔
蔡叔霍叔尹而教之

黃氏曰管今鄭州管城蔡
今蔡州上蔡霍今晉州霍邑

自紂

城而北謂之邶南謂之鄘東謂之衛武王既喪管叔及

其羣弟見周公將攝政乃流言於國曰公將不利於孺子周公避之居東都二年秋大熟未穫有雷電疾風之異乃後成王悅而迎之反而遂居攝三監導武庚叛武王既黜殷命殺武庚復伐三監更於此三國建諸侯以殷餘民封康叔於衛使為之長

康誥疏曰三年滅三監七年始封康叔書傳云

四年封

後世子孫稍并彼二國混而名之七世至頃侯當

周夷王時衛國政衰變風始作作者各有所傷從其國本而異之為邶鄘衛之詩焉 地理志河內本殷之舊

都周既滅殷分其畿內為三國詩風邶庸衛國是也鄩以封紂子武庚庸管叔尹之衛蔡叔尹之以監殷民謂之三監故書序曰武王崩三監畔

孫毓云三監當有霍叔鄭義為長

周

公誅之盡以其地封弟康叔號曰孟侯以夾輔周室

孔氏

曰如志之言則康叔初封即兼彼二國非子孫矣服虔依以為說鄭不然者以周之大國不過五百里王畿千里康叔與之同反遷邶庸之民于雒邑故邶庸衛三國過周公非其制也

之詩相與同風邶詩曰在浚之下庸曰在浚之郊邶又

曰亦流于淇河水洋洋

顏師古曰今邶詩無此句

庸曰送我淇上在

彼中河衛曰瞻彼淇奧河水洋洋故吳公子札聘魯觀
周樂聞邶庸衛之歌曰美哉淵乎吾聞康叔之德如是
是其衛風乎至十六世懿公無道為狄所滅齊桓公率
諸侯伐狄而更封衛於河南曹楚丘是為文公而河內
殷虛更屬於晉康叔之風既歇而紂之化猶存故俗剛
彊多豪桀侵奪薄恩禮好生分 孔氏曰詩人所作自
歌土風驗其水土之名知其國之所在衛曰送子涉淇
至于頓丘頓丘今為郡名在朝歌紂都之東也紂都河

北而鄘曰在彼中河鄘境在南明矣都既近西明不分
國故以為邾在北三國之境地相連接故邾曰亦流于
淇鄘曰送我乎淇之上矣衛曰瞻彼淇奧是以三國皆
言淇也頃公之惡邾人刺之則頃公已前已兼邾與鄘
或亦然矣周自昭王以後政教陵遲諸侯或強弱相陵
故得兼彼二國混一其境同名曰衛也此殷畿千里不
必邾鄘之地止建二國也或多建國數漸并於衛程
氏曰諸侯擅相侵伐衛首并邾鄘之地故為變風之首

董氏曰邶鄘同姓受封國也商俗靡靡周雖化革其

俗其風尚不盡變俗易感而風易變者亡國之餘音也

風首衛且先邶鄘以著滅也 張氏曰周之興也商民

後革及其衰也衛風先變 薛氏曰邶鄘滅而音存故

非衛所能亂 朱氏曰邶鄘不詳其始封邶鄘之詩皆

主衛事而必存其舊號者豈其聲之異歟 補傳曰邶

古作鄆邶鄘衛皆以水得名邶水在太山之阜瀟水出

宜蘇山衛水在靈壽

即真定

郡國志河內郡朝歌北有

邶國

通典衛州衛縣漢朝歌縣志熙寧六年省衛縣為鎮入黎陽

九域

周書作雒曰

俾康叔宇于殷俾中旄父宇于東

注東謂衛殷都鄘康叔代霍叔中旄代管

叔

歐陽氏曰變風自懿王始作

懿王時齊風始變夷王時衛風始變厲王

時陳風始變周召共和唐風始變宣王時秦風始變平

王時鄭風始變惠王時曹風始變張氏曰詩之變自

齊始曷為昉乎此君子之道造端乎夫婦正莫先于二

南變莫甚于衛蓋自商民始也元城劉氏曰以其地

本商之畿內故在王黍離上氏族略自紂城而東謂

之邶未詳張氏曰衛并邶鄘邶鄘之詩皆衛也晉并

魏而魏之詩非晉然其詩亦相附近何也其聲類也魏

唐皆儉故也鄭并鄘而鄘獨遠於鄭何也其聲不類也

自檜以下所不足叙也以為是相去也無幾爾故季札

觀樂於魯歌邶鄘衛則合之歌魏歌唐則別之歌鄭歌

檜則遠之蓋
因以為識焉

城漕

通典滑州白馬縣衛國曹邑

左傳作曹

戴公廬于曹即此

孔氏曰漕地在鄆而邶曰土國城漕國人所築之城也
思須與漕衛女所經之邑也

平陳與宋

輿地廣記陳國今陳州宛丘

漢陳縣

宋國今應天府宋城

漢睢陽縣

朱氏曰平和也合二國之好也舊說以此為春

秋隱四年州吁自立之時宋衛陳蔡伐鄭之事

服虔曰
衛使宋

為主使大夫將故
序衛於陳蔡下

寒泉 浚

通典寒泉在濮州濮陽縣東南浚城 水經注濮水枝

津東逕浚城南而北去濮陽三十五里城側有寒泉岡

即詩爰有寒泉在浚之下世謂之高平渠非也

濮陽今
屬開德

府

李氏曰一云浚水出浚儀東經邶地入濟

輿地廣
記開封

縣有浚溝詩所謂浚郊浚都也祥符縣北有浚水故謂
浚儀有寒泉阪詩爰有寒泉在浚之下 寰宇記在縣西

十里 按毛氏傳浚衛邑于旄云在浚之都下邑曰都當以在濮陽者為正

涇以渭濁

職方氏雍州川涇浸渭地理志涇水出安定郡涇陽縣

西開頭山

今原州百泉縣開苦見反又音牽

東南至京兆陽陵縣入渭

今京兆府高陵縣

渭水出隴西郡首陽縣西南鳥鼠山西北南

谷山

渭州渭源縣今熙州渭源堡說文出首陽渭首亭南谷

東至京兆船司空縣

入河

今華州華陰縣

毛氏曰涇渭相入而清濁異

孔氏曰禹貢涇屬渭

洧注云涇渭發源皆幾二十里然而涇小渭大屬於渭而入於河漢溝洫志涇水一石其泥數斗潘岳西征賦

清渭濁涇是也 朱氏曰涇未屬渭之時雖濁而未甚見由二水既合而清濁益分

鄭氏曰涇

水以有渭故見渭濁此絕去所經見取以自喻

孔氏曰鄭志答

曰衛在東河涇在西河涇不在衛境作詩宜歌土風故言絕去此婦人既絕至涇而自比已志

黎侯

鄭氏曰黎國在衛西今所寓在衛東 孔氏曰杜預云

黎侯國上黨壺關縣有黎亭是在衛之西也

九域志潞州黎侯亭

在黎侯
嶺上

通典潞州上黨縣古黎侯國西伯戡黎即此

漢為壺關縣

又壺關縣古黎國地有羊腸坂後魏移壺關縣於此

說文邕國在

上黨東北 括地志故黎城黎侯國也在潞州黎城縣

東北十八里 黃氏曰今潞州上黨黎城壺關三縣皆

古黎國地

林氏曰周人乘黎黎河北之要害也

列女傳黎莊公之夫人

及傅母作詩

呂氏春秋武王封帝堯之後於黎城蘇氏曰是時衛猶在河北黎衛壤地相接故狄之為

患黎衛共被之

中露 泥中

毛氏曰衛二邑 水經黎陽縣注式微黎侯寓于衛是

也

黃氏曰黎陽本屬衛州今為濬州有黎陽山大伾跨也 寰宇記始以為黎侯寓衛居之故縣得名

河東逕黎縣故城南注云世謂黎侯城管黎侯寓于衛
詩謂胡為乎泥中毛云邑名疑此城也土地汙下城居
小阜魏濮陽郡治也地理志東郡黎縣 寰宇記澶州臨河縣漢為黎縣中露
地未詳郡縣志黎丘在鄆州鄆城縣西四十五里黎侯寓于衛因以為名泥中蓋惡其卑溼也

旄丘

爾雅前高曰旄丘 寰宇記在澶州臨河縣東

九域志開德府

有旄丘

狄人

補傳曰衛穆公之時晉滅赤狄潞氏數之以奪黎氏地之罪是詩作於宣公之後穆公之前孔氏曰狄者北夷之號此詩責衛宣公唯言狄人迫逐不必是赤狄林氏曰史伯曰當成周之北有衛燕翟鮮虞路洛泉徐蒲然則河北自衛之外皆戎狄之國也許氏曰春秋戎先見荆次之狄次之而荆暴於戎狄又暴於荆使無齊桓攘之豈復有中國哉

衛伯

鄭氏曰衛康叔之封爵稱侯今曰伯者時為州伯也

孔氏曰殷之州長曰伯虞夏及周皆曰牧一州一牧二

伯佐之 春秋桓三年齊侯衛侯胥命于蒲陳氏曰諸

侯不稟于天子而私相命於是始於是齊僖稱小伯黎

之臣子亦以方伯責衛宣桓文之事其所由來者漸矣

段氏曰黎之于衛唇齒之邦也黎亡則衛及矣黎既不守衛其免乎其後卒有狄難

西方之人

毛氏曰西方王室 呂氏曰西方指西周也晉語齊姜

氏引西方之書韋昭以為周亦西周也周既東遷而衰
每思其全盛之時文獻之美也 朱氏曰西方美人託
言以指西周之盛王

泉水

呂氏曰泉水即今衛州共城之百泉也淇水出相州林
慮縣東流泉水自西北來注之故曰亦流于淇而竹竿
詩言泉源在左淇水在右者蓋主山而言之相衛之山
東面故以北為左南為右 水經注即泉源之水也淇

水左右蓋舉水所入為左右

必彼泉水韓詩作祕說文作祕

淇

水經淇水出河內隆慮縣西大號山

相州林慮

注自元甫城

東南逕朝歌縣北

竹書紀年晉定公二十八年淇絕于舊衛即此

地理志出

河內共縣北山

郡縣志出共城縣西北沮洳山

東至黎

陽入河溝洫志遮害亭西十八里至淇水口

通典淇水至衛

州衛縣界入河謂之淇水口古朝歌也衛居河淇之間水經注頓丘縣遮害亭

山海經沮

洳之山潑水出焉南流注于河

注今淇水出隆慮大號山東過河內縣南為白

溝

洑 禰

毛氏曰地名 鄭氏曰所嫁國適衛之道所經 地理

志禹貢導沅水東流為洑

注泉出王屋山名為沅流去乃為洑

東郡臨邑

有洑廟

注洑亦濟水字典臨邑在濟州盧縣

通

禰韓詩作坭 寰宇記

大禰溝在漕州冤句縣北七十里

今興仁府冤亭縣九域志詩云飲餞于

濁 朱氏曰皆自衛來時所經之處

蘇氏曰書導沅水東流為濟入於河

溢為榮春秋傳衛敗于榮澤故濟水及衛

干言

毛氏曰所適國郊也

地理志東郡有發干縣

曹氏曰即此所

謂干

郡國志東郡衛國有干城

故發干縣今開德府觀城

隋志九

域志邢州內丘縣有干言山

李公緒曰柏人縣有干山言山柏人邢州堯山縣

水經注泚水又東南經干言山

孔氏曰干涉在郊

則言禰蓋近在國外衛女所嫁國適衛之道所經見故思之

肥泉

水經注馬溝水出朝歌城北又東流與美溝合又東南
注淇水為肥泉詩我思肥泉毛云同出異歸為肥泉爾
雅歸異出同曰肥今是水異出同歸

思須與漕

水經注濮渠東逕須城北詩思須與漕

地理志東郡須昌縣故須句國

今東平府須城縣漕即漕邑

括地志白馬故城在滑州衛南縣西南二十四里戴延之西征記云

白馬城故衛之漕邑
今屬開德府本楚丘之地也

傳氏曰自須至漕由東

而西也

北門

曹氏曰蓋忠臣行役之所由出 毛氏曰北門背明鄉陰

新臺

說文新臺有玼

通典魏州黃縣有新臺

水經注鄆城北岸有新

臺 寰宇記在濮州鄆城縣北十七里

輿地廣記開德府觀城縣有新

臺

二子乘舟

左傳使盜待諸莘 水經注京相璠曰陽平縣北十里

有莘亭自衛適齊之道縣東有二子廟猶謂之孝祠

今大

名府莘縣本陽平屬東郡
郡縣志莘亭在縣北十三里

鄆

通典衛州新鄉縣西南三十二里有鄆城即鄆國

九域志熙

寧六年省新鄉為鎮入
汲鄆城在汲縣東北

補傳曰鄆本庸姓之國漢有

庸光及膠東庸生是其後也古或作庸

傳氏曰孟庸當
是鄆國之姓鄆

為衛所滅故其
後有仕於衛者

孔氏曰王肅服虔以鄆在紂都之西

孫毓云據鄘風定之方中楚丘之歌鄘在紂都之南明
矣沫邦於諸國屬鄘酒誥命康叔明大命于妹邦注云
紂都所處康叔為其連屬之監是康叔并監鄘也

中河

曹氏曰衛國居河淇之間故邶鄘皆以柏舟發興齊地
西以河為境而衛居河之西欲奪共姜歸齊則當乘舟
渡河而去 嚴氏曰鄘在紂都之南則近河矣言中河
以土風所見也

桑中

孔氏曰譜云東及兗州桑土之野今濮水之上地有桑間濮陽在濮水之北是有桑土明矣郡國志東郡濮陽縣有顓帝冢皇覽曰冢在城門外廣陽里中博物記曰桑中在其中地里志衛地有桑間濮上之阻男女亟聚會聲色生焉故俗稱衛之音樂記桑間濮上之音亡國之音也注桑間在濮陽南

郡縣志濮水在曹州南華縣南五里

朱氏曰

桑間衛之桑中是也夫子於鄭衛深絕其聲於樂以為

法而嚴立其辭於詩以為戒 呂氏曰雅鄭不同部其
來尚矣寧有編鄭衛樂曲於雅音中之理乎桑中溱洧
諸篇錄之於經謹世變之始也 楊氏曰此載衛為
戎狄所滅之因也

沫

毛氏曰沫衛邑

鄭氏曰衛之都惡
衛為淫亂之主

書明大命于妹邦

孔氏注紂所都朝歌以北是也

戴氏曰沫上之邑沈湎
惟舊難以康叔化之未

能盡變也遭宣姜
之故風俗益壞

水經注晉書地道記朝歌城本沫

邑武丁始遷居之為殷都

史記武丁徙河北帝王世紀
帝乙復濟河北徙朝歌其子

紂仍都焉

有新聲靡樂

論語撰考識曰邑名朝歌顏淵不舍七十弟子掩目宰予獨顧由麇墮車

括地志朝歌故城在衛州東北七十三里衛縣西二

十二里

衛縣今省為鎮屬濬州黎陽縣

朱氏曰所謂殷墟黃氏曰

沫水在衛之北曹氏曰沫即妹土衛都所在自鄉而

北自北而東言其浸遠也傅氏曰當是紂城外之地

孔氏曰酒誥注妹邦於詩國屬鄘後三分殷畿則紂都屬鄘朝歌即沫也

上宮

通典衛州衛縣有上宮臺

朱氏曰桑中上宮淇上又沫鄉之中小地名也

東徙渡河 漕邑

孔氏曰東徙渡河則戰在河北禹貢豫州滎波既緒注云沅水溢出河為澤今塞為平地滎陽民猶謂其處為滎澤在縣東

今鄭州
滎澤縣

春秋衛及狄戰熒澤此其地也如

禹貢注當在河南時衛都河北狄來伐而禦之既敗而渡河杜預云滎澤當在河北但沅水發源河北入河乃溢為滎則沅水所溢被河南北故河北亦有滎澤但在河南多耳故指豬水則在豫州此戰則在北左傳宋桓

公逆諸河宵濟 水經注白馬濟津之東南有白馬城

衛文公東徙渡河都之故濟取名焉

通典衛州黎陽縣北岸滑州白馬縣

南岸皆有白馬津即酈生云杜白馬之津後魏改黎陽津

孔氏曰衛本河北東徙

渡河野處漕邑則在河南 陳氏曰齊桓存三亡國必

若救衛庶幾於公矣春秋狄入衛不言滅廬于曹不言

遷齊侯使公子無虧戍曹不言救

樂緯稽耀嘉曰狄人與衛戰桓公不救於

其敗也然後救之

載馳言至于漕毛氏曰漕衛東邑

楚丘 楚宮 楚室

鄭氏曰魯僖二年齊桓公城楚丘封衛楚宮謂宗廟也

楚室居室也君子將營宮室宗廟為先廡庫為次居室

為後 鄭志張逸問楚宮今何地答曰楚丘在濟河間

疑在今東郡界 郡縣志隋置楚丘縣屬滑州後改衛

南本漢濮陽縣地

輿地廣記漕楚丘二邑相近今拱州楚丘非衛之所遷縣有景山京岡乃

後人附會名之

通典滑州衛南縣衛文公遷楚丘即此城

五代

屬澶州今為開德府

九域志有楚丘城

地理志齊桓公更封衛於河南

曹楚丘而河內殷虛更屬於晉

堂 景山 京

曹氏曰虛漕虛也升虛以望楚丘與堂邑之間有大山
及高丘形勢之勝可依以立國 毛氏曰楚丘有堂邑

朱氏曰虛故城也堂楚丘之旁邑 傅氏
曰堂當是今博州堂邑 博濮二州連境

商頌陟彼

景山 水經注河水分濟北逕景山東又北逕楚丘城

西 補傳曰景山以大而得名商之故都也衛在商畿

內升故虛以望知地勢之勝

朱氏曰春秋傳言景亳蓋
商所都之山名衛乃商舊

都也 寰宇記景山在澶州衛南縣東南三里

九域志開
德府有景

山

毛氏曰京高丘也

呂氏曰鼂錯言古之徙遠方以實廣虛也相其陰陽之和嘗其

水泉之味審其土地之宜觀其艸木之饒然後營邑立城此蓋古之遺法定之方中公劉所載是也

浚

毛氏曰浚衛邑郊外曰野

爾雅邑外謂之郊

下邑曰都城都城

也

浚城見前

許

春秋譜曰許姜姓與齊同祖堯四嶽伯夷之後也周公封其苗裔文叔于許今潁川許昌是也靈公徙葉悼公

遷夷

一名城父

又居析

一名白羽

許男斯處容城自文叔至莊公

十一世始見春秋地理志潁川許縣故許國二十四世

為楚所滅括地志故城在許州許昌縣南三十里本

漢許縣九域志潁昌府許田縣

熙寧四年省為鎮入長社

孔氏

曰許穆夫人賦載馳而入鄘風者於時國在鄘地

夫人衛女

辭為

衛發

阿丘

爾雅偏髙曰阿丘

謂丘邊髙

衛

地理志河內朝歌縣紂所都康叔所封更名衛

通典古殷朝歌

城在衛州衛縣西

宋忠云康叔從康徙衛

左傳

括地志故康城在許州陽翟縣西北三十五里

祝佗曰分康叔封畛土略自武父以南

衛北界

及圃田之

北竟

鄭數

封於殷墟

朝歌也

朱氏曰衛本都河北朝歌之

東

康誥在茲東土

淇水之北百泉之南其後不知何時并得邶

鄘之地至懿公為狄所滅戴公野處漕邑文公又徙居

楚丘衛故都即今衛縣今懷衛澶相滑濮等州開封大

名府界皆衛境也

呂氏曰衛自康叔受封至君角凡四十世地理志成公徙于帝丘今濮陽

是也秦徙之於野王今懷州始皇既并天下猶獨置衛君二世時乃廢凡九百年最後絕九域志大名府古觀扈國亦商之舊都商城武王伐紂立武庚於此傳氏曰封武庚不於紂都朝歌

淇奧

大學作澳 釋文曰淇衛水 爾雅曰隩隈也 說文

隈厓也其內曰澳其外曰隈

袁氏曰淇水之彎曲處

水經注美

溝水東南注淇水博物志謂之奧水流入於淇漢武帝塞決河用淇園之竹寇恂為河內伐竹淇川治矣今通

望淇川無復此物唯王芻篇草不異毛興

晉灼曰淇園衛之苑也其

地常
多竹

邢侯

地理志趙國襄國縣故邢國 通典邢州治龍岡縣

信今

德府祖乙遷於邢即此 括地志邢國故城在邢州外城

內西南角十三州志云殷時邢侯國周公子封邢侯都此

譚公

春秋譚子注譚國在濟南平陵縣西南

郡國志東平陵有譚城故譚國

通典齊州全節縣春秋時譚國城在縣西南

唐元和十五年

省入歷城

寰宇記譚城在

白虎通作覃

孔氏曰譚子爵言公

歷城縣東南十里今濟南府

者依臣子之稱

農郊

毛氏曰近郊

河水北流

朱氏曰河在齊西衛東北流入海

董氏曰齊地西至

于河衛居河之西則自齊適衛河界其中故曰北流活

活

孔氏曰九河故道河間成平以南平原鬲縣以北曹氏曰河在齊之西而海在北河由齊而入海則為東

北流

頓丘

爾雅丘一成為敦丘

敦亦頓也

地理志東郡頓丘縣

注以丘名

縣丘一成為頓丘謂一頓而成或曰一重之丘

輿地廣記頓丘本衛邑在淇

水南晉置頓丘郡唐大歷七年置澶州晉天福四年以

頓丘為德清軍熙寧四年省頓丘入澶州清豐縣

今開德府

水經注淇水北逕頓丘縣故城西

竹書紀年晉定公三十一年城頓丘

闕駟云頓丘在淇水南又屈逕頓丘西

又東屈而西轉逕頓丘北釋名

謂一頓而成丘無高下小大之殺也詩所謂送子涉淇至于頓丘宿胥故瀆受河於頓丘縣遮害亭東黎山西北會淇水蘇氏曰決宿胥之口魏無虛頓丘即指是瀆也

復關

寰宇記澶州臨河縣復關城在南黃河北阜也復關堤在南三百步自黎陽下入清豐縣界

泉源

朱氏曰泉源即百泉也在衛之西北而東南流入淇故
曰在左淇水在衛之西南而東流與泉源合故曰在右
水經注泉源水有二源一水出朝歌西北又東與左
水合謂之馬溝水又美溝水出朝歌西北大嶺下更出
逕駱駝谷於中逶迤九十曲故俗有美溝之目歷十二
崕崕流相承泉響不斷 寰宇記澶州頓丘縣東北三
十五里有泉源祠 九域志大名府莘縣有泉源河

河廣

孔氏曰此假有渡者之辭文公之時衛已在河南自衛

適宋不渡河宋去衛甚遠喻宋近猶喻河狹

曹氏曰自閔二年東

徙渡河衛已居河東至僖九年宋襄公立己十餘年矣則自衛至宋不必渡河蓋取河為喻

自伯之東

孔氏曰蔡人衛人陳人從王伐鄭

春秋桓五年

鄭在衛之西

南而言東者時三國從王伐鄭則兵至京師乃東行伐鄭也

詩地理攷卷一

欽定四庫全書薈要卷一千九十六

經部

詩地理攷卷二

宋 王應麟 撰

王

鄭氏譜曰王者周東都王城畿內方六百里之地其封域在禹貢豫州太華外方之間北得河陽漸冀州之南始武王作邑於鎬京謂之宗周是為西都周公攝政五年成王在豐欲宅洛邑使召公先相宅既成謂之王城是為東都今河南是也召公既相宅周公往營成周今

洛陽是也成王居洛邑遷殷頑民於成周復還歸處西
都至於夷厲政教尤衰十一世幽王嬖褒姒生伯服廢
申后太子宜咎奔申申后與犬戎攻宗周殺幽王於戲
史記驪山下 晉文侯鄭武公迎宜咎于申而立之是為平王

以亂故徙居東都王城於是王室之尊與諸侯無異其
詩不能復雅故貶之謂之王國之變風 鄭志張逸問
平王微弱其詩不能復雅厲王流於彘幽王滅於戲在
雅何答曰幽厲無道酷虐於民以強暴至於流滅豈如

平王微弱政在諸侯威令不加於百姓乎

泰山孫氏曰詩自黍離而

降書自文侯之命而絕春秋自隱公而始

括地志王城一名河南城本郊

鄔周公新築在河南縣北九里苑內東北隅自平王以

下十二王皆都此城至敬王乃遷都成周

故城在洛陽縣東北二十

六里周公所築赧王又居王城

左傳桓七年王遷盟向民于郊襄二十四年齊人城邾邾王城

朱氏曰王謂周東都洛邑王城

書乃卜澗水東瀍水西惟洛食孔氏曰今

河南城也

王室卑與諸侯無異故其詩不為雅而為風然王

號未替也故不曰周而曰王其地則今河南府及懷孟

等州是也 唐氏曰二南之風也商微而周之興也王之風也周降而詩之將亡也 呂氏曰成周乃東都總

名河南成周之王城也洛陽成周之下都也平王東遷

之後所謂西周者豐鎬也所謂東周者東都也威烈王

之後所謂西周者河南也所謂東周者洛陽也

考王以王城故

地封其弟桓公

補傳曰周之始盛也文王位止西伯未嘗稱

王而二南之化被于天下周之既衰也平王以後雖為天子而王風之詩僅同列國此二南與王風名同為風

實則不同也風之名既同於列國而加以王之一字所以尊周亦所以愧周與孔子於魯春秋書王之意一也服虔云尊之猶稱王猶春秋之王人稱王而列於諸侯之上戴氏曰東遷之後降而為風自季札觀樂已然非聖人降之也吳氏曰王謂王城之地王人王號說皆非

地理志周地今之河

南雒陽穀城平陰偃師鞏緱氏是其分也昔周公營雒邑以為在於土中諸侯蕃屏四方故立京師至平王東居雒邑其後五伯更帥諸侯以尊王室故周於三代最為長久八百餘年襄王以河內賜晉文公又為諸侯所

侵故其分墜小

林氏曰季子觀樂曰思而不懼其周之東乎思者先王之澤也不懼者先王之

教也

夾漈鄭氏曰七月者西周之風黍離者東周之風

宗周

鎬京也書多方王來自奄至于宗周周官歸于宗周

穆天

子傳入于宗周

陳氏曰長安縣昆明池北有鎬陂說文鎬武

王所都在長安西上林苑中地理志初雒邑與宗周

通封畿東西長而南北短短長相覆為千里

顏氏注宗周鎬京也

方八百里為方百里者六十四雒邑成周也方六百里為方百里者三十六二都得百里者百方千里也故詩

曰邦畿千里 韓詩黍離伯封作也

孔氏曰正月云赫赫宗周謂鎬京

也後平王居洛邑亦謂洛邑為宗周祭統云即宮于宗

周謂洛邑也 呂氏曰王者定都天下之所宗也東遷

之後定都于洛則洛亦謂之宗周衛孔悝之鼎銘曰即

宮于宗周是時鎬已封秦宗周蓋指洛也然則宗周初

無定名隨王者所都而名耳

張氏曰黍離閔宗周蕩傷周室皆甚於刺者也

申

鄭語史伯曰當成周者南有申呂 周語富辰曰齊許

申呂由大姜

四國皆姜姓
四嶽之後

地理志南陽郡宛縣故申

伯國

括地志故申城在鄧州南陽縣北三十里
朱氏曰申姜姓之國平王之母家也在今鄧州信陽軍

之境平王以申國近楚數被侵伐遣畿內之民戍之
孔氏曰宣王時申伯以王舅改封於謝宛縣者謂宣王
改封之後以前不知其地申在陳鄭之南後竟為楚
所滅林氏曰周平受國於賊而不能討故諸侯強而
莫能制呂氏曰平王戍
申與晉平公城杞相類

甫

書呂刑孔氏注呂侯後為甫侯故或稱甫刑

唐世系表
宣王世改

呂為甫朱氏曰甫即呂也亦姜姓呂刑
禮記作甫刑當時蓋以申故而并戍之

徐廣記曰呂

在宛縣

左傳楚子重請取於申呂以為賞田申公巫臣曰不可此申呂所以邑也是以為賦以御北方

若取之是無申呂也晉鄭必至于漢史記呂尚先祖為四嶽佐禹治水有功虞夏之際受封於呂列女傳太姜

有呂氏

水經注宛西呂城四嶽受封於呂

括地志故呂城在鄧

之女

州南陽縣西四十里呂氏春秋呂在宛縣西伯夷主四嶽之祀佐禹有功氏曰有呂或為甫郡國志汝南新蔡有大呂亭故呂侯國輿地廣記蔡州新蔡縣古呂國今以左傳攷之楚有申呂時新蔡屬蔡非楚邑當以在宛縣為正

許見前

孔氏曰言甫許者以其俱為姜姓其實不成甫許也

六國

時秦趙同為嬴姓史記漢書多謂秦為趙亦此類

留

曹氏曰留本邑名其大夫以為氏

鄭

鄭氏譜曰初宣王封母弟友於宗周畿內咸林之地是為鄭桓公今京兆鄭縣是其都也又為幽王大司徒甚得周衆與東土之人問於史伯曰王室多故余懼及焉其何所可以逃死史伯曰其濟洛河潁之間乎是其子

男之國虢鄆為大虢叔恃勢鄆仲恃險皆有驕侈怠慢之心加以貪冒君若以周難之故寄帑與賄不敢不許是驕而貪必將背君君以成周之衆奉辭伐罪無不克矣若克二邑鄆蔽補丹依疇歷華

孔氏曰八國皆在四水之間韋昭曰八邑

君之土也修典刑以守之惟是可以少固桓公從之言然之後三年幽王為犬戎所殺桓公死之其子武公與晉文侯定平王於東都王城卒取史伯所云十邑之地右洛左濟前華後河食漆洧焉今河南新鄭是也

鄭發墨守

云武公遷居
東周畿內

武公又作卿士國人宜之鄭之變風又作

地理志鄭國今河南之新鄭本高辛氏火正祝融之
虛也及成皋滎陽潁川之崇高陽城皆鄭分也土陋而
險山居谷汲男女亟聚會故其俗淫鄭詩曰出其東門
有女如雲又曰溱與洧方灌灌兮士與女方秉菅兮恂
盱且樂惟士與女伊其相謔此其風也吳札聞鄭之歌
曰美哉其細已甚民弗堪也是其先亡乎自武公後二
十三世為韓所滅 通鑑外紀宣王二十二年封季弟

友於鄭都咸林 括地志鄭故城在華州鄭縣西北三

里桓公友之邑秦縣之

武公十一年初縣鄭

朱氏曰新鄭今之

鄭州 水經注竹書紀年晉文侯二年王子多父伐鄆

克之乃居鄭父之丘名之曰鄭是為桓公帝王世紀云

或言縣故有熊氏之墟黃帝所都也

孔氏曰鄭世家號鄆果猷十邑竟國

之則桓公自取十邑見史伯為桓公謀故傳會為此說

服虔云鄭東鄭古鄆國之地是鄭雖取其地不居其

都僖三十三年左傳稱文夫人葬公子瑕於鄆城之下

服虔云鄆故鄆國之墟杜預云鄆國在滎陽密縣東北

新鄭在滎陽宛陵縣西南是

鄭非鄆都故別有鄆城也

郡縣志鄭州新鄭縣鄭

武公之國都

韓滅鄭自平陽徙都之戰國策韓之取鄭從成皋始

林氏曰春秋戰爭之多者莫

如鄭戰國戰爭之多者莫如韓秦漢之間天下有變必於滎陽成皋之間決勝負

朱氏曰鄭

聲之淫有甚於衛故夫子論為邦獨以鄭聲為戒而不

及衛

周禮疏曰鄭詩說婦人者九篇

吳氏曰齊詩刺哀襄而季札觀

樂乃曰泱泱乎大風也哉鄭美武公父子而札乃曰其

細已甚曰大曰細自其土地風氣之發於音聲者言之

而非繫乎辭也班孟堅曰民性剛柔緩急音聲不同繫

水土之風氣故劉夢得論八音與政通以三光五嶽之

氣為言固有見於此

祭仲

括地志故祭城在鄭州管城縣東北十五里鄭大夫祭

仲邑

水經注長垣縣有祭城祭仲之邑長垣今屬開封府

京

括地志京縣故城在鄭州滎陽縣東南二十里鄭之京

邑

穀梁傳襄十一年同盟于京城北地理志河南郡京縣即共叔段所居曹氏曰滎陽故東虢國也有

京水索水楚漢戰於京索之間即其地也京邑在滎陽縣東敖倉鴻溝在縣西官渡在中年皆古戰爭處左

傳鄭京櫟實殺曼伯注云厲公得櫟又并京郎縣志
京水出滎陽縣南平地楚語范無宇曰國為大城未
有利者叔段以京
患嚴公鄭幾不封

清 彭 消 軸 河上

郡國志河南中牟縣有清口水 水經注清池水出清

陽亭西南平地東北流逕清陽亭南東流即故清人城

也詩清人在彭彭為高克邑杜預春秋釋地云中牟縣

西有清陽亭是也清水又屈而北流至清口澤

中牟今屬開封

府

鄭氏曰清者高克所帥衆之邑 毛氏曰彭衛之

河上鄭之郊也消軸河上地 孔氏曰禦狄於境在鄭

衛境上翱翔河上是營軍近河而衛境亦至河南

彭消軸皆

河上之地蓋久不得歸師有遷移三地亦不相遠

漆洧

陳氏曰鄭國在漆洧二水之間 說文引詩潛與洧潛

水出鄭國

漆水出桂陽臨武入匯當以潛為正

洧水出潁川陽城山東南

入潁

陽城省入河南府登封縣

郛縣志漆水源出鄭州新鄭縣西

北三十里平地洧水縣西北二十里

水經洧水出河

南密縣西南馬領山

密縣今屬鄭州地理志出陽城縣陽城山

又東過新鄭

縣南澧水從西北來注之

注洧水東逕新鄭故城中襄元年晉伐鄭敗其徒兵於洧

上又東為洧淵水龍鬬於時門之外洧淵則此潭也洧水又東與黃水合經謂澧水非也

又東過習

陽城西折入于潁

地理志洧水東南至長平入潁長平省入陳州西華縣

鄭語

主芣騶而食漆洧

地理志密縣有大騶山

韓詩漆與洧方洹洹

兮傳云三月桃華水下之時執蘭拂除辟君注鄭國之

俗三月上巳之漆洧兩水之上秉蘭草祓除不祥

十道志曰

鄭俗以三月合於漆洧之上以自祓除括地志

孟

洧水在新鄭縣北三里古新鄭城南與漆水合

子曰子產以其秉興濟人於溱洧

東門

左傳隱四年宋陳蔡衛伐鄭圍其東門

朱氏曰城東門也

學校

曹氏曰校本夏之學名鄭亦以名學故鄭人游鄉校以議執政

齊

鄭氏譜曰齊者古少皞之世爽鳩氏

司寇也

之墟周武王

伐紂封太師呂望於齊是謂齊太公地方百里都營丘

周公致太平敷定九畿復夏禹之舊制成王用周公之

法制廣大邦國之境而齊受上公之地更方五百里其

封域東至于海西至于河南至於穆陵

沂州沂水縣北有穆陵山

至于無棣

滄州無棣縣南無棣溝

在禹貢青州岱山之陰濰淄之

野其子丁公嗣位於王官後五世哀公政衰荒淫怠慢

紀侯譖之於周懿王使烹焉齊之變風始作 地理志

齊詩曰子之營兮遭我庫囂之間兮又曰蒺我於著乎

而此亦其舒緩之體也吳札聞齊之歌曰泱泱乎大風也哉表東海者其太公乎國未可量也古有分土無分民太公以齊地負海舄鹵少五穀而人民寡廼勸以女功之業通魚鹽之利而人物輻湊後十四世桓公用管仲設輕重以富國合諸侯成伯功身在陪臣而取三歸故其俗彌侈其後二十九世為彊臣田和所滅臨淄海岱之間一都會也其中具五民云太史公曰吾適齊自泰山屬之琅邪北被于海膏壤二千里其民閭達多

匿知其天性也以太公之聖建國本桓公之盛修善政以為諸侯會盟稱伯不亦宜乎洋洋哉固大國之風也

朱氏曰今青齊淄濰德棣等州是其地也

世家云胡公徙都薄

姑獻公徙治臨淄括地志青州博昌縣東北六十里薄姑城天齊池在青州臨淄縣東南十五里封禪書云齊所以為齊地理志成王滅蒲姑以封師尚父

注武王封太公

者以天齊

於齊初未得爽鳩之地成王以益之也左傳晏子曰昔爽鳩氏始居此地季荊因之有逢伯陵因之薄姑氏

因之而後太公因之水經注薄姑齊郡臨淄縣師尚故城在臨菑縣西北五十里近濟水

父所封

即營丘也今青州西北四十里樂記齊者三代之遺聲也齊人識之故謂之齊

營

地理志臨淄名營丘齊詩曰子之營兮注毛詩作還齊

詩作營

水經注臨淄城中丘淄水出其前經其左故有營丘之名孔氏曰水所營繞釋丘云水出其

左營丘今齊之營丘淄水過其南乃東以丘臨水謂之臨淄與營丘二地

括地志營丘在

臨淄北百步外城中爾雅齊曰營州疏博物志云營

與青同海東有青丘齊有營丘

曹氏曰說者以茂也昌也皆地名

猺

括地志作猺注山名字或作猺亦作巖

乃高反經注作猺

水相

逢於嶺山也

董氏曰皆山名在齊之郊說文嶺山在齊集注本作嶺

著

地理志俟我於著乎而注著地名濟南郡著縣 水經
漯水東北逕著縣故城南

南山

朱氏曰齊南山也

魯道

水經注汶水南逕鉅平縣故城東

鉅平省入兗州博城今襲慶府奉符縣

西南流域東有魯道詩所謂魯道有蕩今汶上夾水有文姜臺汶水西南流詩云汶水滔滔

汶水

淮南隆形訓汶出弗其流合於濟

注弗其山在北海朱虛縣東禹貢浮于

汶達于涕

曹氏曰汶水許氏以為出琅邪朱虛縣東泰山

括地志朱虛故城在青州臨朐縣東

東至安丘入濰

今密州安丘縣

桑欽以為出

泰山萊蕪縣原山

郡縣志兗州乾封縣東北括地志淄州淄川縣東南七十里原山

西

南入濟

蔡氏曰在今鄆州中都縣括地志東至青州博昌

班孟堅兩存其說閔

子騫曰吾必在汶上矣說者主桑欽義以為汶在齊南

魯北在汶上者欲北如齊也

董氏曰出萊蕪者今須城之汶是也出朱虛者今濰

之東南有大汶小汶是也

郕縣志汶陽城在兗州龔

丘縣東北五十四里汶陽之田謂此

孔氏曰汶水之

北尚是魯地

曾氏曰汶水有二出萊蕪縣原山入濟者徐

州之汶也出朱虛泰山北又東北入濰者青州之汶也

朱氏曰在齊南

魯北二國之境

魏

鄭氏譜曰魏者虞舜夏禹所都之地在禹貢冀州雷首

之北析城之西周以封同姓焉其封域南枕河曲北涉汾水昔舜耕於歷山陶於河濱禹菲飲食而致孝乎鬼神惡衣服而致美乎黻冕卑宮室而盡力乎溝洫此一帝一王儉約之化於時猶存

孔氏曰舜都蒲坂禹都平陽或安邑魏皆近之

及

今魏君嗇且褊急不務廣修德於民教以義方其與秦晉鄰國日見侵削國人憂之當周平桓之世魏之變風

始作

孔氏曰西接於秦北鄰於晉桓四年秦師圍魏終為晉所滅

地理志曰魏國

姬姓也在晉之南河曲

服虔曰魏在晉之蒲坂

故詩曰彼汾一曲

寘諸河之側吳札聞魏之歌曰美哉泯泯乎以德輔此

則明主也

晉獻公滅魏

河東郡河北縣詩魏國

郡縣志魏城在陝州芮城

縣北五里以輿地廣記河中府永樂縣古魏國漢為河北縣唐分芮城置永樂

蘇氏曰魏地

入晉久矣其詩疑皆為晉而作故列於唐風之前猶邠

鄘之於衛也

朱氏曰公行公路公族皆晉官疑實晉詩又恐魏亦嘗有此官魏分河中府解州即

其地郡縣志河中府春秋時為魏地

汾沮洳

地理志汾水出太原郡汾陽縣北山

水經出汾縣北管涔山括地志出

嵐州靜樂縣北管涔山今屬憲州山海經管涔之山汾水出焉說文出晉陽山西南至汾陰

入河

今河中府榮河縣汾水北去寶鼎縣二十五里

蘇氏曰汾水出於

晉其流及魏朱氏曰沮洳水浸處下溼之地一曲謂

水曲流處

山海經沮洳之山郭氏注引詩彼汾沮洳

水經汾水西至汾陰

縣北西入于河

入河之處即魏之舊國

十畝之間

水經注故魏國城南西二面並去大河可二十餘里北去首山十餘里處河山之間土地迫隘故魏風著十畝

之詩 朱氏曰十畝之間郊外所受塲圃之地十畝之外鄰圃也

河之干

水經河水東過河北縣南又東永樂澗水注之

注云水北出于

薄上南流逕河北縣故城西故魏國也永樂漢水又南入于河晉獻公滅魏後乃縣之在河之北故曰河北縣薄山即襄山在潼關北十餘里郡縣志河水經永樂縣南二里董氏曰河濁而在岸之干之側之湑者也清

唐

鄭氏譜曰唐者帝堯舊都之地今曰太原晉陽是堯始居此後乃遷河東平陽成王封母弟叔虞於堯之故墟曰唐侯南有晉水至子變改為晉侯其封域在禹貢冀州太行恒山之西太原太岳之野至曾孫成侯南徙居曲沃近平陽焉昔堯之末洪水九年下民其咨萬國不粒於時殺禮以救難厄其流乃被於今當周公召公共和之時成侯曾孫僖侯甚嗇愛物儉不中禮國人閔之唐之變風始作其孫穆侯又徙於絳云地理志河東

土地平易有鹽鐵之饒本唐堯所居詩風唐魏之國也
其民有先王遺教君子深思小人儉陋故唐詩蟋蟀山
樞葛生之篇曰今我不樂日月其邁宛其死矣宅人是
媮百歲之後歸于其居皆思奢儉之中念死生之慮吳
札聞唐之歌曰思深哉其有陶唐氏之遺民乎文公後
十六世為韓魏趙所滅三家皆自立為諸侯是為三晉
太原郡晉陽縣故詩唐國龍山在西北晉水所出東入汾
臣瓚曰唐今河東永安是也去晉四百里又云堯居唐
東於冀千里順帝改冀曰永安則瓚以唐國為永安

皇甫謐云堯始封於唐今中山唐縣是也後徙晉陽及為天子都平陽於詩為唐國則唐國為平陽此二說詩之唐國不在晉陽 顏師古以瓚說為是 曹氏曰意唐叔受封之始實在永安至子豎徙居晉水之陽後人遂以晉陽為唐之故國歟

左傳唐叔命以唐誥而封於夏虛

注大夏今

晉陽 晉世家唐在河汾之東方百里 孔氏曰禹都平陽或於安邑或於晉陽夏都亦在晉境故云夏墟 括地志故唐城在絳州翼城縣西二十里即堯裔子所封 朱氏曰唐叔所封在今

太原府

呂氏曰晉陽漢太原郡所治隋以古晉陽為太原縣太平興國四年徙州治陽曲而空其故城

世本云居鄂括地志故鄂城在慈州昌寧縣二里

水經汾水過晉陽縣東晉

水從縣南東流注之

晉水出縣西懸壺山

括地志故唐城在并

州晉陽縣北二里

堯築也國都城記堯父徙居晉水傍唐城即堯父初徙之處

諸

侯譜云晉穆侯遷都於絳孝侯改絳為翼

故翼城一名絳在絳州

翼城縣東南十五里

左傳

獻公又命曰絳景公遷

注翼晉舊都在絳邑縣東

新田

今絳州絳縣

晉語景霍以為城汾河洑澮以為淵戎

狄之民實環之

朱氏曰其詩不謂之晉而謂之唐蓋仍其始封之舊號補傳曰魏舜禹之故

都晉堯之故都在雍冀之間三聖人皆有儉德遺風百世未泯

沃鵠

毛氏曰沃曲沃

孔氏曰在河東聞喜縣聞喜今屬解州成侯徙居曲沃則為晉都至昭公分

曲沃封桓叔則昭公已前已徙絳矣然則穆侯
以後晉常都絳序言沃則既封之後謂之沃國 鵠曲沃

邑

孔氏曰其都在曲沃其傍更有邑

水經注左邑故城故曲沃

傳曰下國

即新城也漢武以為聞喜縣

涑水自城西注水流急濬故詩人以為

激揚之水

曹氏曰自桓叔初封曲沃至武公滅晉凡

六十七歲

竹書紀年莊伯十二年翼侯焚曲沃之禾林氏曰曲沃之民知有曲沃不知有宗國

首陽

朱氏曰首山之南也

孔氏曰首陽之山河東蒲坂縣

南馬融曰華山之北河曲之中

左傳趙宣子田于首山晉志蒲坂有雷首山

夷齊居其陽蒲坂舜都也 石曼卿詩
云恥生湯武干戈日寧死唐虞揖遜區

水經注雷首

山一名中 臨大河北去蒲坂三十里

郡縣志在河中府河東縣南十五里

輿地廣記在永樂縣北三十里

山南曰首陽 河東縣本漢蒲坂縣地伯

夷墓在縣南三十

五里雷首山南

秦

鄭氏譜曰秦者隴西谷名於禹貢近雍州鳥鼠之山堯

時有伯翳者

伯益

實皋陶之子佐禹治水

列女傳皋子生五歲而佐禹

中候苗興云皋陶之苗為秦

水土既平舜命作虞官掌上下草木鳥

獸賜姓曰嬴歷夏商興衰亦世有人焉周孝王使其末
孫非子養馬於汧渭之間孝王為伯翳能知禽獸之言
子孫不絕故封非子為附庸邑之於秦谷至曾孫秦仲
宣王又命作大夫始有車馬禮樂侍御之好國人美之
秦之變風始作

鄭語史伯曰秦仲嬴
之雋也其將興乎

秦仲之孫襄公平

王之初興兵討西戎以救周平王東遷王城乃以岐豐
之地賜之始列為諸侯遂橫有周西都宗周畿內八百

里之地其封域東至池山

孔氏池謂靡池
禹貢無池山

在荆岐終南

惇物之野至玄孫德公又徙於雍云

地理志扶風雍縣

地理

志非子邑于秦今隴西秦亭秦谷是也

括地志秦州

清水縣本名秦十三州志云秦亭秦谷

通典秦州古西戎之地秦始皇封

之邑輿地廣記秦州隴城縣有秦谷史記莊公伐西戎破之周宣王予大駱犬丘為西垂大夫括地志秦州上邽縣西南九十里是也世紀襄公徙汧故城在隴州汧源縣南三里文公還居非子舊墟犬丘在汧渭之間即槐里是也在京兆府興平縣東南十里寧公徙平陽故城在鳳翔府岐山縣西四十六里有平陽聚德公居雍故城在鳳翔府天興縣南七里獻公徙櫟陽在京兆府櫟陽縣東北孝公徙咸陽故城在咸陽縣東十五里

水經注秦川有故亭秦仲所封

孔氏曰德公之後常居雍季札見歌

秦曰此之謂夏聲服虔云與諸夏同風杜預云秦本在西戎汧隴之西秦仲始有車馬禮樂去戎狄之音而有諸夏之聲地理志天水隴西山多林木民以板為室

屋及安定北地上郡西河皆迫近戎狄修習戰備高上氣力以射獵為先故秦詩曰在其板屋又曰王于興師修我甲兵與子偕行及車麟四載小戎之篇皆言車馬

田狩之事漢興六郡良家子選給羽林期門以材力為

官名將多出焉

穆公稱伯以河為竟
注地界東至於河

朱氏曰秦人之

之所為豈自知能入人如此之深耶其漸靡使然李
氏曰鄭風都曼齊風闡緩秦風庶劬亦由風聲氣俗使
然

阪有漆

曹氏曰說文阪山脅也地理志隴西有隴坻在其西注
隴阪也即今隴山三秦記其阪九回欲上者七日乃越
高處東望秦川然則阪固秦地之所有也

通典秦州有大阪名曰隴

坻亦曰隴山

西戎

朱氏曰西戎者秦之臣子所不與共戴天之讐也襄公承天子之命以報君父之仇所以能用其人而秦人所以樂為之用也溫其在邑西鄙之邑也

史記襄公十二年伐戎而至岐辛

後漢西羌傳秦襄公攻戎救周及平王之末戎逼諸

夏自隴山以東及乎伊洛往往有戎於是渭首有狄獠

音九

邽冀之戎涇北有義渠之戎洛川有大荔之戎渭南

有驪戎伊洛間有楊拒泉皋之戎潁首以西有蠻氏之

戎

穆公得戎人由余遂霸西戎開地千里 史記匈奴傳自隴以西有緜諸緄戎翟獠之戎岐梁山涇漆之

北有義渠大荔
烏氏朐衍之戎

漢匈奴傳秦襄公伐戎至郊始列為

諸侯

張氏曰車鄰駟驢小戎諸詩武事備矣蓋其地與戎錯而秦仲以來武事最勝故能使秦伯有天下

者是詩也而使之不二世而失國者亦是詩也夫其嚴急之風與三代之溫柔敦厚抑何遠哉

取周地

歐陽氏曰按史記平王封襄公為諸侯賜以岐西之地
子文公立十六年以兵伐戎戎敗走遂收周餘民有之
地至岐蓋自戎侵奪岐豐周遂東遷雖以岐豐賜秦使
自攻取而終襄公之世不能取之但嘗一以兵至岐至

文公始逐戎而取之 孔氏曰襄公救周即得之本紀
之言不可信 呂氏曰蘇氏謂周之失計未有如東遷
之謬使平王定不遷之計收豐鎬之遺民以形勢臨諸
侯齊晉雖大未敢貳也此論失於考之不精岐豐之地
自犬戎盤據舊都非周所有故平王遂以賜襄公使之
自取其勢非可以不遷也

終南

郡縣志終南山在京兆府萬年縣南五十里一名太一

亦名終南

又在鳳翔府郿縣南三十里

張衡西京賦終南太一隆崛

崔宰潘岳西征賦云九峻截薛太一龍嵒面終南而背

雲陽跨平原而連嶠冢然則終南太一非一山也畢原

在縣西南二十八里詩注云畢

周公葬于畢是也

終南之道名

也左傳中南九州之險也杜氏注在武功縣南今郿縣通典長安縣有終南山地理志在武功縣東括地

志一名南山

柳子曰惟終南據天之中在都之南西

至于褒斜又西至于隴首以臨于戎東至于商顏又東

至于太華以距于關實能作固以屏王室其物產之厚

器用之出則璆珠琅玕夏書載焉紀堂條梅秦風詠焉

毛氏曰終南周之名山中南也李善曰終南南山

之總名太一一山之別號孔氏曰本紀云賜襄公岐

以西之地文公收周餘民有之地至岐岐以東獻之周則襄公所得自岐以西如鄭譜則是全得西畿案終南山在岐之東南大夫之戒襄公引終南為喻則襄公亦得岐東非唯自岐以西也地理志秦地瀕南山近夏陽多阻險輕薄 李氏曰終南西距鳳翔武功北距萬年長安 毛氏曰紀基也堂畢

道平如堂也 鄭氏曰畢也堂也亦高大之山所宜有

也畢終南之道名邊如堂之牆 孔氏曰釋丘云畢堂

牆 郭璞云今終南山道名畢 曹氏曰紀崔靈思集注作屺曰終南之旁有屺山字當作屺 爾雅說文皆

以山如堂者曰密謂形如堂室也此言終南形勢之壯朱氏曰紀山之庶角堂山之寬平處寰宇記堂即畢

也原

三良

括地志秦穆公冢在岐州雍縣東南二里三良冢在雍

縣一里故城內

今鳳翔府天興縣東坡蘇氏秦穆公墓詩橐泉在城東墓在城西無百步

渭陽

鄭氏曰秦是時都雍至渭陽者蓋東行送舅氏於咸陽之地孔氏曰雍在渭南水北曰陽晉在秦東行必渡渭地理志在扶風渭城縣故咸陽也其地在渭水之北曹氏曰渡渭而送之至於渭北言其遠也水經渭

水逕長安城北注即咸陽也

郡縣志京兆府咸陽縣本秦舊縣渭水南去縣三里

秦咸陽在今縣

東二十二里

陳

鄭氏譜曰陳者大皞處戲氏之墟帝舜之胄有虞闕父

者為周武王陶正武王賴其利器用與其神明之後封

其子媯滿於陳都宛丘之側是曰陳胡公以備三恪

說文

作妻以元女大姬其封域在禹貢豫州之東其地廣平

無名山大澤西望外方東不及明

音

緒

書盟豬爾雅孟諸

大姬

無子好巫覡禱祈鬼神歌舞之樂民俗化而為之五世
至幽公當厲王時政衰大夫淫荒所為無度國人傷而
刺之陳之變風作矣 地理志大姬婦人尊貴好祭祀

用史巫故其俗巫鬼陳詩曰坎其擊鼓宛丘之下亡冬
亡夏值其鷺羽又曰東門之枌宛丘之栩子仲之子婆
娑其下此其風也吳札聞陳之歌曰國亡主其能久乎
自胡公後二十三世為楚所滅 通典陳州宛丘縣陳

都

今淮寧府 九域志城陳胡公所築

唐氏曰陳靈公弑而楚子入陳

則王迹熄矣詩之所以亡也

歐陽氏曰陳最後至項王時猶有靈公之詩霸者興

變風息焉王道

廢詩不作焉

宛丘

水經注宛丘在陳城南道東

王隱曰漸欲平今不知所在矣

爾雅陳

有宛丘注今在陳郡陳縣

郡縣志宛丘在陳州宛丘

縣南三里

括地志縣在陳城中古陳國

毛氏曰四方高中央下曰

宛丘輿地廣記爾雅丘上有丘曰宛丘今其地形則

然

今陳州城在古陳城內西北隅陳都在宛丘之側

孔氏曰釋丘云宛中宛

丘言中央宛宛然是為四方高中央下郭璞謂中央隆峻狀如一丘與毛傳正反

爾雅天下有名丘五其三在河南其二在河北

東門之粉

毛氏曰東門宛丘國之交會戴氏曰陳詩多言東門必陳人遊息之地南方之原范氏曰擇高明之地而荒樂焉

東門之池

郡縣志東門池在陳州城東門內道南毛氏曰池城

池也 水經注陳城故陳國也東門內有池池水東西七十步南北八十許步水至清潔而不耗竭不生魚草水中有故臺處詩所謂東門之池也

墓門

楚辭天問何繁鳥萃棘負子肆情王逸注云解居父聘吳過陳之墓門見婦人負其子欲與之淫泆婦人引詩刺之曰墓門有棘有鴉萃止 列女傳陳辯女陳國採桑之女也為歌曰墓門有棘墓門有棘 毛氏曰墓道

之門

防 邛

郡國志陳國陳縣

今宛丘縣

注博物記曰邛地在縣北防亭

在焉

毛氏曰防邑也邛丘也

株林

毛氏曰夏氏邑

孔氏曰邑在國外

郡國志陳縣注

陳有株邑蓋朱襄之邑

寰宇記陳州南頓縣西南三十里有夏亭城城北五里有株林

郡縣志宋州柘城縣本陳之株邑

詩株林是也故柘城在寧遠縣南七十里陳之株邑

柘城寧陵今屬拱

州

檜

左傳國語作鄩

地理志作會

鄭氏譜曰檜者古高

辛氏火正祝融之墟國在禹貢豫州外方之北滎波之

南居溱洧之間祝融氏名黎其後八姓

己董彭虎
姁曹斟羊

唯姁

姓檜者處其地焉

孔氏曰檜祝融之
後復居祝融之墟

周夷王厲王之時

檜公不務正事而好絜衣服大夫去之於是檜之變風

始作其國北鄰於虢

謂東
虢

鄭語姁姓鄩

注陸終第四
子求言為姁

姓封于鄆鄆今新鄭也史記陸終生子六人四曰鄆人世本曰陸終生六子四曰鄆人宋忠云鄆國名

姁姓所出周語鄆之亡由叔姁

郡縣志鄆城在鄭州新鄭縣東北

三十二里

括地志云二十二里史記注徐廣曰鄆在密縣漢屬河南郡唐屬鄭州後屬河南府

今屬鄭州水經注洧水又東南逕鄆城南注劉禎云北鄰於虢

孔氏曰鄭譜以鄭

因虢檜之城而國之先譜檜事然後譜鄭檜曹國小而

君奢民勞而政僻季札之所不譏風次于未宜哉蘇

氏曰檜詩皆為鄭作如邶鄘之於衛也通典河南府

密縣古鄆國有洧水鄆水

杜預云鄆城在鄭州新鄭縣荊陽密縣東北

有溱洧二水本鄆國之地

密新鄭連境

水經注竹書紀年

晉文侯二年同王子多父伐鄆克之乃居鄭父之丘名

之曰鄭是曰桓公 徐廣曰鄆在密縣不得在外方之

北也

左傳鄆城注在密縣東北

西歸

鄭氏曰檜在周之東故言西歸

孔氏曰檜在滎陽周都豐鎬周在于西故言西

曹

鄭氏譜曰曹者禹貢兗州陶丘之北地名周武王既定

天下封弟叔振鐸於曹今日濟陰定陶是也其封域在雷夏洶澤之野昔帝堯嘗遊成陽死而葬焉舜漁於雷澤民俗始化其遺風重厚多君子務稼穡薄衣食以致畜積夾於魯衛之間又寡於患難末時富而無教乃更驕侈十一世當周惠王時政衰昭公好奢而任小人曹之變風始作輿地廣記廣濟軍定陶縣故三膠國周封曹叔振鐸於此

陶丘在西南
洶澤在東北

郡縣志古曹國在曹

州濟陰縣東北四十七里自曹叔至伯陽凡十八葉

今興

仁府濟陰縣本漢定陶縣
地唐為曹州省定陶入焉

孔氏曰曹都雖在濟陰其

地則踰濟北

僖三十一年取濟西田傳曰分曹地也曹在汶南濟東據魯而言是濟西魯在其東

南衛在其西北

地理志濟陰郡成陽有堯冢靈臺昔堯作游于成陽今濮州雷澤縣

陳氏曰

檜亡東周之始也曹亡春秋之終也夫子之刪詩繫曹

檜於國風之後於檜之卒篇曰思周道也傷天下之無

王也於曹之卒篇曰思治也傷天下之無伯也程氏

曰檜曹懼於危亡而思周道故為亂之終

曹氏曰亂極則思治變極

則反正故以
幽風繼之

南山

毛氏曰曹南山也 郡縣志曹南山在曹州濟陰縣東

二十里詩南山朝濟是也

寰宇記在
縣東南

春秋盟于曹南

括地志有曹

南因名曹

周京

京周

京師

公劉京師之野朱氏曰京師高丘而衆居之也 董氏

曰所謂京師者始於此其後世因以所都曰京師曰嬪
于京依其在京則岐周之京也王配于京則鎬京也春

秋所書京師則洛邑也皆仍其本號而稱之猶晉之言

新絳故絳也洛邑謂之洛師正京師之意

呂氏曰下泉作於齊桓之

後李氏曰周京者周室所居之京師也京周者京師所治之周室也

郇伯

左傳郇文之昭也 毛氏曰郇伯郇侯 鄭氏曰文王

之子為州伯 春秋釋地曰解縣西北有郇城

左傳盟于郇

說文國在晉地

服虔曰郇國在解縣東郇瑕氏之墟也 水

經注涑水西逕郇城郇伯故國也今解故城東北二十

四里有故城在猗氏故城西北俗名為郇城 輿地廣
記河中府猗氏縣有郇城文王子所封詩郇伯 括地
志城在縣西南四里

豳

鄭氏譜曰豳者后稷之曾孫曰公劉者自郇而出所徙
戎狄之地名今屬右扶風枸邑公劉以夏后大康時失
其官守竄於此地猶修后稷之業勤恤愛民民咸歸之
而國成焉其封域在禹貢雍州岐山之北原隰之野至

商之末世大王又避戎狄之難而入處於岐陽民又歸之公劉之出大王之入雖有其異由有事難之故皆能守后稷之教不失其德成王之時周公避流言之難出居東都二年思公劉大王居豳之職憂念民事至苦之功以比序已志後成王迎而反之攝政致太平其出入也一德不回純似於公劉大王之所為大師大述其志主意於豳公之事故別其詩以為豳國變風焉 朱氏曰虞夏之際棄為后稷而封於郃及夏之衰棄稷不務

棄子不窋失其官守而自竄於戎狄之間不窋生鞠陶
鞠陶生公劉能復修后稷之業民以富實乃相土地之
宜而立國於豳之谷焉十世而太王徙居岐山之陽十
二世而文王始受天命十三世而武王遂為天子武王
崩成王立年幼不能莅阼周公旦以冢宰攝政乃述后
稷公劉之化作詩一篇以戒成王謂之豳風而後人又
取周公所作及凡為周公而作之詩以附焉豳在今邠
州三水縣邠在今京兆府武功縣

郡縣志寧州城即公
劉邑地後魏為邠州

改為幽後

周語夏之衰不密竄戎狄之間

韋昭云幽西近戎北

改為寧州

近狄

孔氏曰不密已竄幽地定國於幽自公劉

地

始也

郡縣志慶州治東南三里有不密故城

理志昔后稷封釐公劉處幽太王徙郊文王作鄠武王

治鎬其民有先王遺風好稼穡務本業故幽詩言農桑

衣食之本甚備右扶風枸邑縣有幽鄉詩幽國公劉所

都

徐廣曰漆縣東北有幽亭

通典曰邠州古幽國

西魏置幽州開元十三年改為

邠

郡縣志古幽城在邠州三水縣西三十里公劉始

都之處

枸邑故城在縣東二十五里

括地志縣西十里有幽原幽城在原上史記正義武王登邠

之阜以望商

邑蓋登此城

孔氏曰鄭譜王在豳後

公劉為狄迫逐而徙居詩度其

夕陽豳居允荒本紀公劉在我狄間杜預云豳在新平

漆縣東北郃始平武功縣所治釐城郃近而豳遠公劉

初居豳太王終去豳俱是先公之俊

括地志郃州新平縣即漢漆縣詩豳國

鄭志張逸問

豳七月專詠周公之德宜在雅今在風何答曰以周公

事專為一國上冠先公之業所以在風下次於雅前

曹氏曰不窋之居於豳未能國也至其孫公劉始立國

焉后稷開國在郃豳雖非后稷之舊而豳公所修者實

后稷之業故併以后稷繫之豳其後自豳而岐自岐而

程自程而豐自豐而鎬積累增修而後王業成焉 吳

氏曰風有周召王豳地則皆周地詩則皆周詩如邶鄘

衛之為三魏唐之為二其詩所從得之地不同其發於

聲者不一故本其地而繫之也

張氏曰黍離出於洛陽者也七月出於豳者也

歐陽氏曰周南召南邶鄘衛王鄭齊豳秦魏唐陳鄆

曹此孔子未刪之前周大師歌樂之次第也

季札觀樂於魯次第

此如周召邶鄘衛檜鄭齊魏唐秦陳曹豳王此鄭氏詩譜

次第也

張氏曰始於二南終於豳聖人所以為無窮也

東山

程氏曰東山所征之地 李氏曰周在豐鎬三監叛其

地在王室之東周公自周征之是自西而東故謂東征

今按商故都在河北唐杜牧以河北為山東秦漢謂山東山西者皆指太行山東山即商地 孔氏曰金縢云

周公居東二年周公在東實出入三年

四國

毛氏曰四國管蔡商奄也 書序三監及淮夷叛

三監管叔

蔡叔霍叔也以其監殷故謂之三監 成王東伐淮夷遂踐奄說文邠國在魯 括地志兗州曲阜縣奄至即

奄國之地

左傳周有徐奄注二國嬴姓分魯公因商

奄之民

孟子注奄東方國

通鑑外紀奄君謂武庚

祿父曰此百世之時也請舉事祿父從之率奄淮夷叛

周公奉王命興師東伐

書多方注云奄國在淮夷之

傍孔氏曰書傳稱周公二年救亂二年克殷三年踐

奄書傳又曰奄君薄姑薄姑齊地名非奄君名

四

國不數淮夷

四國之君祿父管叔皆見殺蔡叔放之

奄遷其君於齊

周書作雒篇武王克殷乃立王子祿

父俾守商祀建管叔于東建蔡叔霍叔于殷俾監殷臣

周公立相天子三叔及殷東徐奄及熊盈以叛周公

召公內弭父兄外撫諸侯二年乃作師旅臨衛攻殷大

震潰降辟三叔王子祿父北奔管叔霍叔縊乃囚蔡叔

于郭陵凡所征熊盈族十有七國俘維九邑俘殷獻民

遷于九里成周之地俾康叔宇于殷俾中莒父宇于東

歐陽氏曰周召王幽皆出於周邶鄘合於衛檜魏世

家絕其可考者七國而已

詩地理攷卷二

謹案總說第二頁前三行自傳於此名也刊本名
訛明據注疏本改

第二頁後七行憂娛之萌漸刊本娛字訛作誤據
注疏本改

卷一第六頁後三行述三王之迹亦必及周召刊
本脫召字據逸齋詩補傳增

第九頁前六行大別之東彭蠡之西刊本西訛東
據禹貢諸家說及水經注改

第十九頁後五行六行渭水出隴西郡首陽縣西
南鳥鼠山西北南谷山案漢書地理志無西北
南谷山五字當是引水經注文訛入于此

卷二第三頁後八行為方百里者三十六刊本方
字訛作六據漢書注改

第六頁前三行奉辭伐罪刊本伐訛罰據國語改
第十頁後三行更方五百里刊本方訛立據注疏
本所載詩譜改


第十一頁後三行胡公徙都薄姑刊本公訛氏據
史記齊世家改

第十三頁前四行弗其山在北海朱虛縣東刊本
北訛此據淮南子注改

第十六頁後七行龍山在西北刊本龍山二字訛
作壘據漢書地理志改正

第二十三頁後二行大夫之戒襄公刊本襄訛襄
據毛詩疏改





總校官庶吉士臣侍朝

校對官中書臣朱炘

謄錄貢生臣蕭志鴻